

فابريکا

عبدہ نافع

[فابريكا] ديوان بالعامية.

عبد الحميد (عبدہ) نافع.

الطبعة الأولى ديسمبر ٢٠١٤.

تصميم الغلاف: محمد سمير

[facebook.com/Msamir111](https://facebook.com/Msamir111)

تدقيق لغوي وتنسيق: إسلام علي

[facebook.com/ISCOTO](https://facebook.com/ISCOTO)

المدير العام : رباب الشهاوي

رقم الإيداع بدار الكتب المصرية: ٢٠١٤/٢٦٨٩١

رقم الإيداع الدولي: ISBN ٩٧٨-٩٧٧-٨٥١٥٣-٥-٠

جميع الحقوق محفوظة لدار الفؤاد للنشر والتوزيع،  
وأي اقتباس أو تقليد أو إعادة طبع أو نشر أي جزء من  
هذا العمل، سواء الكترونياً أو فوتوغرافياً أو أي شكل  
آخر دون تصريح كتابي موثق من الناشر، يعرض مرتكبه  
للمساءلة القانونية.

[Alfouad\\_publishing@hotmail.com](mailto:Alfouad_publishing@hotmail.com)

[facebook.com/fouadpublishing](https://facebook.com/fouadpublishing)



# فابريکا

(دیوان عامیة)

ل

عبدہ نافع



## ♥ إهداء ♥

أهدي ديواني الأول إلى أبي وأمي وإخوتي..  
وكل من قرأ لي حرفاً..

إهداء إلى أبويا اليي مكانش مقتنع إني بكتب شعر..  
وبرضه مش هاقدر أقنعه لبعده السبع سماوات..

إهداء للراجل الجدع.. محمد مجدي.

إهداء لأخويا الصغير الي مشفتوش.. (مصطفى رشاد)

إهداء لنصي الثاني الي لاقيته صدفة.. (سيد فتحي)

إهداء للراجل الي عاوز يعمل كل حاجة.. (أحمد فوزي)

إهداء لأكثر حد بختلف معاه وبرضه أصحاب..

(عمرو نافع)

إهداء لأخويا الكبير الي مش من ظهر أبويا..

(محمد حامد)

إهداء لعمي الي قتلته "يا بابا" أكثر من أبويا..

(أبو النجا نافع)

إهداء للبنات الي مش هينفع أكتب أساميهم

إهداء خاص إلى خطيبتتي الغالية وزوجتي المستقبلية

ولـ (أحمد) و(ليلى) إن شاء الله.



## « مقدمة »

### اليأس..

عمري ما كنت أتخيل إنني أقدر أكتب أربع سطور فيهم حاجة مفيدة.

وف كل مرة كنت بحاول أكتب، كنت بفشل. لحد ما دخلت عالم الفيسبوك.

الفيسبوك أكثر حد قدر يقنعني إن أنا أكتب حتى لو كلام مش مفهوم.

بشكر كل أصدقائي ع الفيسبوك إنهم قدروا يستحملوني في الفترة الي كنت بكتب فيها نكش فراخ تحت مسمى شعر بالعامية، من 2011 لـ 2013.

كل المدة دي مقدرتش أطلع منها بقصيدة واحدة، وبالفعل بطلت أكتب.

وف آخر 2013، البنت الي بالي بالك أقنعتني أكتب تاني، وبدأت أقرأ لشعراء كتير.

وفضلت ورايا لحد ما كتبت.. #فابريكا.

بشكر أي حد بعيد كل البعد عن موضوع الشعر لكن مستحملني.

بشكر كل الناس الي مش مهتمة بيا أو باللي بقدمه.

بشكر كل الناس اللي مهتمة.. ومتابعين.  
وشكر خاص لحامل هذا الديوان.

## الناس..

بحب الناس جدًا سواء أعرفهم أو معرفهمش.  
بحب أرغي كثير.. مبقدرش أقعد ساكت.  
مبقدرش أكمل موضوع جد للآخر.. لازم أهرز.  
على قد ما بحب الناس بخاف منهم.

## الرضا..

أنا راضي بكل حاجة ربنا كاتبها لي  
راضي باللي ف جيبني وراضي باللي ف إيديا  
وراضي بكل حاجة وصلتلها، وهقبل وهرضى باللي مش  
هقدر أوصله.

فابريكا مش ديوان شعر وبس..

فابريكا ثقة وبداية.. أتمنى ينال إعجابكم.

عبدہ نافع



## درويش

أنا أبسط أبسط خلق الله  
أنا مش بكرهكم ولا حاجة  
درويش ماشي بيقول لله  
بيعدّ الخطوة بسجادة  
القلب تملي كتاب مفتوح  
من غير تفكير للخير يروح  
مش بزعل لما ببات مجروح  
أنا طفل بيعشق بسذاجة

## إكرام الميت دفنه

اسمع كده

خليك كده.. ودنك على قلبي هنا

هاااا.. سمعت إيه؟

قلبي مبقاش يدق ليه؟

عطلان من فترة مبيدقش

وصراحة أنا سايبه ومبدقش

أصل أنا تقريباً سايب كل حمولي عليه

يظهر من ثقل الشيل.. شاب

مع إني صغير وشباب

لاء.. متبصش للكام شعراية دول

أنا عمري معداش العشرين

ومن كتر خيانة البني آدمين

شعري ابيض

والاسود مبقاش بيدوم ليومين

تكراري بيسقط ع الأرض

مالك؟! شكلك نمت  
نَفَسك دافي وراسك تقلت  
لما أنا فضفضت  
طب نام وارتاح  
وانسى الى حكيته  
أنا واحد مجنون قرر إنه  
يحيى لـ ميت مات على إيده

# هتبعدي ليه؟

هتبعدي ليه؟  
مادام ف الآخر هنتقابل  
لُقا المجانين  
يجوز لو كنا بنتساهل  
نعيش ف نعيم  
ويجوز منعش  
وده ميمنعش  
نتفارق.. فراق عاقل  
ومنتجنش  
فيه كلام وقت الفراق يتقال  
وفيه ميتقالش  
وليه هنقول؟  
مادام الفراق مكتوب  
ما نتفارق كده ف سكات  
بلاش أوهام

ومين قلبه مات  
وقدرنا نحضنه بـ كلام  
سيبيننا نروح  
مفيش مجروح  
هيبقى تمام  
بنفس الدوسة على جرحه  
يجوز ومحال مع الأيام  
ألقى طبيب  
وأخف وأطيب  
على علاجه مع شرحه  
وأجيلك تانى ونكمل  
بقولك إيه...  
هلف الدائرة مـ الأول  
مرار كاسك  
أنا شاربه ١٠٠ مرة  
ف خدت عليه  
ف عادى أنا راضي ومكمل  
مفيش داعي للـ فُرقة

مادام قلبی فیہ دقہ  
ہتبعدی لیہ؟

## اختلاف

اختلاف في الحب لما تندهك تقولك "يا عم"  
اختلاف في كلمة "حبيبي" تحسها بعطف أم  
تقوم ترد انت عليها، تقولها: "زهّني حبك"  
ثم ضحكة فيها غمزة مبيّنة زعلها منك  
ثم قلم على خدودها  
ثم عافية تاخذها حضنك  
اختلاف في الصورة  
لما تلغي ضحكة عشان تكشّر  
ثم هي عاملة فيها ست عجوزة تقولش ستك  
تطلع صورة حد ثاني مش شبهكم  
والغريب لو حد ثاني شاف صوركم  
قوام بيضحك ويقولها ده بجد شبهك  
اختلاف في كل مرة أشوفها فيها  
ولو جربت أمسك إيديها  
يقوم شيطانها قوام غالبها

وبأي حاجة تحدفني بيها  
كي تكون تلك الفتاة بتستقوى علشان ف بيتها  
ورغم ذلك سوف أرحل عندما أفتح دماغها  
نفسي تفهم شيء مهم إن أنا أجنّ منها  
اختلاف ف كل شيء اختلاف ف كل ضحكة  
اختلاف ف كل كلمة اختلاف ف أي فكرة  
بنت راجل عمرها ما قالت بخاف  
بحبها ومعرفش ليه  
يمكن عشان بتفرق كثير  
عن أي بنت وحبها كله اختلاف



## ألبوم صور

مفاضلش منهم غير صور  
على كام قميص وكام چاكت  
صيف شتا جوة الدولاب  
مبقاش ليهم ولا أثر  
من ضحكهم ف الذكريات  
ولا حتى دوشة أو رزع باب  
ألبوم متكون م الماضي  
متبعتر جواه ألفين عام  
من أول طفولتهم يمكن  
لحد ما قالوا وداع ف سلام  
وإزاز التسريحة حابسهم  
وخذ نسخة من شكل الوش  
وبرغم إني بجد حابهم  
بصبر قلبي على فراقهم  
وأقول معلش!!

ما أنا بكرة هكون جوة الألبوم

وهفارق ناس كنت معاهم

ثانية بثنائية

مفيش أصلاً إنسان بيدوم

هنزول هنزول ونحصلهم

وهو ده حال الدنيا

أنا عادي فـ أغلب الأوقات

مش بزعل أو بعمل ناسي

أنا كدأااب!!

من كتر التفكير فـ الحكايات

على طول ببكي وبقاسي

وعايشها عذاب

الصالة أساساً متر فـ متر

مكانتش بتستحمل ملتنا

دلوقتي كبيرة وخفياني

قالولي هتنساهم بالسَّكر

أو أغير فـ معالم بيتنا

سكرت كثير، غيرت كثير

وأتاريهم الأقرب لخيالي

## الدخان

ف الأول كل الناس بتبان  
صافية وبيضة من جواهرهم  
معرفش ليه بعدد الأيام  
بندم إني قعدت معاهم  
كل القاعدين م الأول كانوا  
بتجمعهم مصلحة ع الماشي  
إنسان واحد حبني ف الله  
قبل ما يحكي قطعوا لسانه  
وزودوا فحم الشيشة عشانه  
غير فكرته بعد الدخان  
ولاي الشيشة زي التعبان  
بيلف علينا واحد واحد  
مش أحسن واحد ف القاعدة  
دا أنا أكثر واحد سكران  
نزلت قعدت معاهم يمكن

مـ التفكير مش عارف أنا  
مش حابب أكون دائماً خرمان  
أنا هابدأ أبطل تدخين  
مش رايح تاني مع الرايحين  
أنا نفسي أبويا قبل أما أخرج  
يقفش فيا ويعملي كمين  
رايح فين؟؟ جاي منين؟؟  
رغي كتير زي زمان  
مش هزهق أبدا بالله  
أنا نفسي أموت جداً جداً  
وصدري خالي من الدخان

## دردشة أموات

الغايب من كام شهر  
لساه بي فوت قدام  
كان بينا يادوب كام متر  
دلوقتي كام فدان  
أنا فاكر شكله تملي  
لساه ف الصورة حاضي  
أنا حابك أوي ف الصورة  
علشان ف الصورة هتعيش  
وهتفضل جمبي كتير  
بردك لساك بتغير  
مش هيفرقنا الموت  
بعدك ف الدنيا مليش  
في الدنيا تملي الجرح  
بيعلم فيا وفيك  
وزمان اللمة الجاز

ياما لاسعة ف العواجيز  
طب فكك م الألغاز  
خلينا جوة الصورة  
نتحامى ف البرواز  
لو نخرج برة أكيد  
هنتوه ونسيب الحد  
وهتبقى عليا شديد  
وهتبقالي أبعد حد  
ولو حابب نرجع تاني  
هتمد إيديك لإيديا  
ف هسيبك مهما تشد  
متستغربش لضعفي  
في الدنيا تملي الناس  
بتسيبك وقت الجد  
تيجي نلعب بالكوتشينة؟  
صدقني أنا مش خايب  
مهما تفنط هتلاقي  
ف ورقنا هيطلع شايب

أهو ده شكلنا دلوقت  
كل ما نبعد ونغيب  
ونحاول نرجع تاني  
بنبعد أكثر ونشيب  
صالحني وهاتلي هدية  
اصرفلي ما ف الجيب  
مش هرضى بالي تجيبه  
أنا هاطمع مهما تجيب  
وبردك هفضل زعلان  
على بعدك مش ندمان  
علشان مـ الأول قلت  
خلينا جوة الصورة  
وطلعت.. انت الخسران  
أما أنا مش فارقة خلاص  
مبقاش جوايا إحساس  
طب عاوز تبقى معايا  
اتسبح يلا ونام  
راح أجيلك جوة منام



نحكي ونقول حواديت  
يا أهبل يا أبو مخ عبيط  
خدلك ف الاوضة كام لفة  
أنا ميت وانت العايش  
وانت اللي بكيت ف الدفنة

## الـبـنـت

الـبـنـت الـي تحبـك فعلاً  
صدقني دي حالة مبتكر رش  
حاول تتمسك بيها جداً  
لو ضاعت منك مبتتعوضش  
الـبـنـت أساساً فزورة  
حلها يتشاف في عنينا وبس  
ومهما بتضحك في الصورة  
بتكون مكسورة مبتبينش  
افهمها وحاول بيها تحس  
الـبـنـت عاقبها بشيكولاتة  
واشكمها بوردة وحنية  
واحكيلها حدوتة قبل النوم  
وكمل نومها باغنية  
الـبـنـت دي أعقل مجنونة  
في شاركها جنونها ومتزهقش

وإِوعَاكَ تَكْسِرُ فَرِحَتَهَا  
فَرِحَتَهَا إِزَازَ مَبْتَتَجْمَعَشَ

## رسالة

أنا معرفش ليه بقرب أما بحتاجك  
أنا آسف أنا مقصدش أنسالك  
أنا غرقان، ف مد إيدك ورسيني  
أنا عطشان حنين زمزم  
ونفسي بجد تسقيني  
مراكب سايرة بإرادتك  
ف بحر نهايته مش باينة  
أنا عبدك أنا طالبك  
زي ما رسيته ترسيني  
أنا قلبي الوحيد مكسور  
أنا عاشق لضي النور  
ف كتابك...  
أنا مذنّب ونفسي أتوب  
أنا نفسي أكون أيوب  
وأنول بابك...

وحامل للرسول كلمة  
أمانة عليك توصلها على لساني  
يا بخت اللي عاش وياك  
ولمح نور ربنا ف وجهك  
يا بخت اللي صلّى وراك  
ورفع إيديه للسما ف ضهرك  
يا بخت اللي صلّى عليك  
وسمعت صوته بودنك  
ويا بختي أما أنول رؤياك  
وأبقي ف الجنة مصاحبك  
وشكراً يا رب على وقتك  
والقلب لو مكسور هفضفض لمين غيرك؟!  
أنا بشكرك مش قصدي أشكيلك  
بشكرك جداً عشان بتسمعني  
ف كل مرة أنا أجيلك  
بشكرك تاني عشان  
تسمحلي تاني اما أنجرح... أناديك

## مش كفر

الوقت ف بعدك مبيخلصش  
والليل بيعاند ويّايا  
والنوم والله مبيتنامش  
علشان نفسي تكوني معايا  
أنا آسف جدّا يا حبيبتى  
مش قادر أكون وياكى بجد  
أصعب إحساس ف الدنيا  
وقت أما يكون واحشك حد  
انت ف دنيا وهو ف دنيا  
وما بينكم سماوات تتعد  
أنا مؤمن جدّا بالله  
ودي سنّة وفرض وطبع حياة  
لكن وجعاني قولة "آاه"  
علشان بحتاجلك وقت الجد  
الناس ف غيابك مش ناس

والدنيا صعبة من غيرك  
مبقتش بحب أعاشر الناس  
أنا نفسي بجد إني اجيلك  
مش كفر لا سمح الله يعني  
دي مجرد أمنية حلال  
أنا عارفك ساكنة فـ الجنة  
وأنا بدعي دائماً وبتمنى  
نتقابل تاني وأبقى معاكي  
طبعاً شايفاني دلوقت  
وأنا شايفك بمرور الوقت  
أول ما أُلح بنتنا (ليلي)  
دي بتحفظ قرآن زيك  
وبتكـره جدّاً لون المـوـث  
بـصـراحة فـولة ومقسومة منك  
بتـصـبـرّ بيها على فراقك  
أنا أكثر حاجة بخاف منها  
وقت أما هتيجي تسأل عنك  
أنا آسف جدّاً يا حبيبتي

لو جيت وقتها فجأة ودمعت  
أنا أصلاً من غيرك بضعف  
وهضعف أكثر مهما كبرت  
أنا جايلك علشان وحشاني  
وفاهم طبعاً إن أنا واحشك  
وآسف جداً إني اتأخرت



## تلت ثلاثات

ساعي البريد بيشيل م الهموم جوابات  
على جنب كان شايل بالظبط تلت ضحكات  
الأولى...

وقت الوجع تغطي على حزنه  
والثانية...

وقت الجد والحق على فمه  
والثالثة...

وقت الشيبة لما يسلموا المعاشات  
عم فلان فلاح ملهوش ف الجوابات  
في أرضه كان زارع بالظبط تلت وردات  
الأولى...

لجل مراته هداها ونال حبها  
والثانية...

لجل أمه سابها على قبرها

والتالثة...

هيسيبها تطرح زيادة لو مات  
أفقر فقير عايش ميعرفش حب الذات  
عاش عمره بالكامل مستني تلت كلمات  
الأولى...

انت ابني بمعنى حضن بجد  
والتانية...

ده سقفك وعمره ما هيتهد  
والتالثة...

حلفان بعد أما يحكيك متزايدش بالحكايات

## خلف خلف

جربت تحس بروحك  
سايباك وبتسكن غيرك  
وكإنك كل طموحك  
تتنفس نفسه تعيش  
وتعلق كل حياتك  
بما فيها من تفاصيل  
بحبال أصلاً مش خيش  
جربت بإنك تبكي  
ف ركن الأوضة قلمي  
وإن جه سأل المتسبب  
تضحك وتقوله مفيش  
جربت بإنك تفهم  
كل ما هو الأعيب  
وعشان بتخاف تتفارق  
دائماً سايق التطنيش  
مش قصدي أقلل منك

ولا قصدي أعيب فيك  
كل اللي أنا قصدي أقوله  
إن انت بكل سذاجة  
بتحب حاجات مش ليك  
أما اللي كان فـ إيديك  
كرهته بالتمليك  
واللي مش ملكك  
رغم إنه مش حقك  
أدمنته زي عنيك  
سيب اللي ساب وامشي  
ده مش هيفضللك  
لو كان هيبقالك  
كان اتبقى ليك ضلك  
الحاجة تملي خُلف خلاف  
هتدوم للحاجة فـ هتسيبك  
وتسيب الحاجة فـ بتدوملك  
الفكرة فـ إنك لما تعوز  
مش شرط الحاجة تفضلك

# زي الشمعة<sup>٣</sup>

آخر دمعة...  
كات للشمعة  
كانت بالليل...  
كهريا قاطعة...  
ف عز الولعة  
والجو سئيل...  
عمرك أصلاً زي الشمعة  
بتخلص دمعة تجر ف دمعة  
ماشية بسرعة زي الريح  
تشبه خطبة يوم الجمعة  
مبقتش خطبة زي زمان  
قال الله وقال رسوله  
وفجأة تلاقي أمامك قام  
وكله بيجري يقف قدام  
شمعة عمرك قايدة بنارك  
فاكر آخر شكل لجارك

مرتبّ حزنك جوة دولاب  
حابس روحك قافل بابك  
متقفلهوش سيبه مفتوح  
أو وارب آخر سك الباب&&  
يمكن يرمي عليك السلام  
بالله هتنول ع الرد ثواب  
زي الشمعة والعة فجأة  
نارها بتجري وعمرك فات  
محتاجة نفخة عشان تطّفي  
وآخر نفس جواك مات  
مراية عمرك مش عارفك  
ليه دايماً مديها قفاك  
كل ما تنده تقولها بس  
وواخذ كل طريقك عكس  
دورّ وشك واجه نفسك  
حاول مرة تكشف سرك  
حاول يمكن تلحق عمرك  
وتلحق آخر دمة ف دمعك

## شد اللجام<sup>٣</sup>

شد اللجام عـ الي اتولد  
واكسر جناح حلم الولد  
وافطمه قبل المعاد  
وكرّره أوي فـ البلد  
علّمه يغادر بلاده  
علّمه يطيع جلاده  
علمه إزاي يموت  
قبل ما يتكتبه معاده  
اقطع لسانه إن قال لأ  
اختم إيديه بالدق  
واكتب عيل مطيع  
عمره ما عرف الحق  
فهّمه إن الي مد إيديه شحات  
ملوش دية  
وإن البيه

هو اللي لابس بدلة  
مكويّة  
علّمه القيمة بالمظاهر  
علّمه إن اللي ظاهر  
من عيوب الناس  
هو ده اللي يتكلم عليه  
علمه إزاي يجامل  
واضربه إن معرفش  
علمه إزاي يسب  
وحاول تاني لو مقدرش  
فهمه إن الرجولة بتتلخص  
ف حط القرش ع القرش  
إوعي القروش تخلص  
متخليهوش يوفي  
متعلموش يصدق  
متعودوش يُخلص  
متعلموش سنن رسولنا  
وإن الرياضة حلال



علّمه الكوتشينة  
وإن الولد ييقش  
وإن جمال منظره بطبيعة الحال  
وقت أما يبقى بكرش

## حالة نفسية

أخبارك إيه طمني عليك؟  
فينك مش باين كالعادة؟  
يا ابني التكشيرة مش لايقالك  
والدنيا مش محتاجة حاجة  
ومفيش فيها حاجة باقيالك  
فد احلم ومتمناش حاجة  
اسمع طيب.. خليك طيب  
ليه اتغيرت مع الأيام؟!  
هتكسب إيه من أي فراق  
عارفك بتخاف مـ الأحلام  
حلمت كثير.. مبحثقش  
عادي ولا يهمك.. ومتقلقش  
أنا أعرف واحد كان زيك  
كان شبهي وشبهك بالملي  
كان دائماً يحلم عـ الفاضي

كان دائماً خائف م الماضي  
كان يلبس أشيك لبس جديد  
ويقضي الشهر وجيبه فاضي  
عارف دلوقت بيعمل إيه؟  
أهو قاعد ف الأوضة تملي  
باعد عن الناس بقاله فترة  
كان أقرب واحد ف الدنيا  
لما أزھق كان يسمعلي  
وأنا كنت بسد الدين وأسمعه  
أهو قاعد يحرق ف سجاير  
وكل ما تخلص بولعه  
الأوضة اتكتمت م الدخان  
مبقتش معاه بعرف أنا  
وشكله اتغير من براه  
أنا نفسي أخرج من جواه  
أقولك.. متاخدش ف بالك  
وأسف جداً ل جنابك  
حاولت أتكلم مع غيرك

ومش بعرف أفضفض غير ليك  
خلاص مش هتكلم تاني  
مش هزعج أبدا معاليك  
وابقى اسأل دائماً كالعادة  
وأمانة تطمني عليك

## وردّة

البت عبارة  
عن وردة جميلة  
أوام هتفتّح بين إيدك  
ده لو تسقيها بحنية  
عوّدها معاك تبقى رزينة  
قربها أوي جوة عينيك  
وفاجئها بشيكولاتة وهدية  
حبّها هتكون أجمل زينة  
مهما تشوف مهما قابلت  
فهمها بانك ف جزيرة  
مفيهاش ولا بنت  
مفيهاش ولا بنت  
إلا عينيها  
إوعى ف مرة  
تيجي ترغي معاك

ترد تقول فضيها سيرة  
طمنها وفهمها بهدوء  
ابعد عنها أي شكوك  
وإياك تتملك م الغيرة  
بالله تريحها من الحيرة  
وإياك تزعلها ولو ليلة  
خَلَّيْ عيونك ليها مرايا  
واعمل ليها أحلى ضفيرة  
غنيلها لو طلبت عادي  
وَصَلِّها بإيديك للنادي  
دي البنت عبارة  
عن وردة جميلة  
أوام هتفتَّح بين إيدك  
ده لو تسقيها بحنية

## دايرة

عن أول لمسة لكف أُمي  
مع أول خطوة أنا خطيتها  
عن أول مترين بجريهم  
عن ضحكة أُمي وفرحتها  
عن دقن أبويا لما تشوَّك  
وقت أما يبوسني من خدي  
عن أول فرحة بلبس جديد  
وأنام وأنا واخده ف حضني  
عن أول خوف م الضلمة  
عن أول دوشة م اللمة  
عن استغراي م الدنيا  
وسؤالي المتكرر دائماً  
إزاي عايشين!!؟  
عن ضحكة أبويا بسؤالي  
وإجابته الواصل منها تمام

"ربنا ده كريم"

عن وشي ١١ متكرمش

مش فاهم أصلاً بيقول ايه

عن صمت وتوهة وسرحان

ربنا مين؟ وساكن فين؟

كات أول مرة أبص لفوق

وأسرح أوي ويا العصافير

وأكلم ربنا وأطلب منه

لعبة صغيرة أو يعني اتنين

عن (صلى الله عليه وسلم)

مش فاهم ليه دائماً تتقال بعد (محمد)

عن كف أبويا المرفوع وهو بيحمد

وأسمعه بيقول

"ارزقنا الجنة مع حبيبك.. ده انت العالم"

عن سنة ورا سنة وفجأة كبرت

عن أول حاجة حبيتها وضاعت مني

وسابتني ف سبت

عن أول بنت حبيتها وطبيعي حبتني



وخانتني ف خُنت  
عن أول كسر ف رجلياً  
ونومي الدائم مبتحركش  
عن سنده أُمي وأنا بتمشى  
فكّرني بأول لمسة زمان  
وساعتها فهمت إن الدنيا  
دايرة كبيرة ومبتخلصش  
هتلف الدائرة وهتعجز  
وهتفهم إنك من برة مهما كبرت  
جواك عيل مبيكبرش

## ديون

فاضلك إيه؟  
من اللي فات  
ضاع بالشمال  
ضاع باليمين  
متقولش هات  
وكفاية دين  
كل الديون  
متعلقة ف رقبتك  
ممکن تقول  
هتسدها منين؟  
عن أي ضحكة كسرتها  
ف وش أمك ولا أبوك  
عن أي غلطة غلطتها  
ف حق صاحبك ولا أخوك  
عن أي بنت جرحتها

وبالحلال عَشَّمَتَهَا  
عن أي حاجة خدتها  
مش مقسومالك وقتها  
كل الحاجات دي ديون  
بس اللي يفهم مين؟  
كل الديون  
متعلقة  
تقدر تقول  
هتسدها مين؟

## ما تضعفشي

أول ما تفتح ف الكلام  
نصيحة مني  
ما تضعفشي.  
أول ما هتبدأ عينك تلمع  
اضحك جدًا  
ما تسرحشي.  
أول ما تبقى قصاد روحك  
هنا بالذات  
ما تضحكشي.  
طيب نفسك  
داوي جروحك  
ابكي كتير  
واحكي لذاتك  
اضحك جدًا  
ف وش اخواتك

عارف يا فلان؟  
حُضن الغريب أهون  
بس ابقى نَقِّي الصنف  
ساعتين وهتفارقه  
مش هيوجعك أبدًا  
وملكش نقطة ضعف  
عارف يا فلان..  
أنا مرة حكيت خَلَّاني بكيت  
وراح ماشي.  
عارف يا فلان..  
أنا مهما حكيت لقريب  
بعد البكا والبوح  
ما برتاحشي

## المستحيل

لسة بتقلب ف صوره  
لسة بتقرا كل كلمة  
كتبها ليها!  
لسة حاسة إن عمره  
مـ خانها ثانية  
وعمره مرة ما كان ناسيها!  
المشكلة مش ف البعاد  
المشكلة دايماً ضميرها  
ف وقت ما يكونوا بَعَاد  
متأكدة عمره ما خانها  
حافضة اسمه فاكرة شكله  
حافضة رقمه فاكرة رسمه  
إزاي هتنسى وهو عايش  
جوة منها!؟  
نايمة حاضنة إيديها صورته

وضحكة مرسومة رقيقة  
باينة عليها!  
نايمة بتفكر تقابله  
حتى لمجرد دقيقة  
يمكن تصحى روحها فيها!  
المشكلة كان ليها روحها  
ومين بالكلام يداوي جروحها  
أصل اللي راح لا يمكن يعود  
ولا عمره هيبقى ليه وجود  
بتكتب كلامه متابعة غرامه  
فاكرة سلامه بتعشق سكاته  
إزاي بتبعد وكل ذكرى  
عايشة بيها

## لغة ترس

إيه اتغير وليه متحير  
بين فرحة وتكشيرة وش؟!  
وقت الضحكة ألاقيني بكش  
وقت التكشيرة بضحك جدًّا  
أنا عاقل أنا مجنون فعلاً  
مش فالح غير ف حَمَامِي أَطِير  
رغم إن فلوسي مبتحيرش  
شاري حمام وبطيّره  
تفكيري واقف مبيفكرش  
أنا حتى بفكّر أغيره  
أو حتى أعمل ليه عمرة  
شدة سمكرة كدا ع الماشي  
أنا نفسي أروح أعمل عمرة  
وأدعيلي طول ما أنا ماشي  
يمكن نقصاني حبة بركة



من عند الله  
مفيش غيره أصلاً ليا  
وعمري ما بنسأه  
أنا فاكِر نفسي وأنا صغير  
مكانتش الفرحة تغيب عني  
كنت أفرح حتى بربع جنيه  
أول ما باخده من عمي  
مكنش ساعتها أيس كريم  
ده كان اسمه جيلاتي  
والقلبظ وسلاحف النينجا  
يااه ع الايام لما بتجري!  
أنا فاكِر حتى زمان أختي  
كانت بتغير لما الكوتشي  
بتاعي ينور!!  
كانت تجري على أوضتها  
تغيظني بفستانها البمبي  
اكنه قصير!!  
أهي كبرت دلوقتي خلاص

مبقتش صراحة بتتغاظ  
علشان دلوقت لابسة حجاب  
والكوتشي بتاعي مبقاش بينور  
أهو حال الدنيا بتتغير  
وأنا كل أما أكبر بتغير  
زي الدنيا  
أنا أبويا زمان وأنا صغير  
قالي "اسمع يا ابني"  
الدنيا دي فانية  
وقالي كمان الدنيا دي ماشية  
تضحك تفرح تبكي وتزعل  
بردك ماشية على لفة ترس  
بس أنا مفهمتش!!  
طب كان يستنى لما أكبر  
كنت ساعتها استوعبت الدرس

## إِدمان

بتجري ف دمي أفيون  
وضاع عمري ف إدمانها  
حبي ليها شيء ملعون  
نفسي بجد أبطلها  
قلبي المريض بيها  
لعنته ١٠٠ مرة  
على طول مخالفني  
وسابها تعيش جوة  
أما مراية الاوضة  
دائماً بتخذلني وبجد كارها  
كل أما أبصلها  
فجأة بدون داعي على طول شايفها  
نفسي أقول أنا تبت عن حبك  
وبناقص الغرام  
ما أنا الغلطان..

وأصلا حبك من الأول ده حب حرام  
مينفعشي  
وميشفعشي  
ومينفعليش دخول جنة  
أجبرتيني أكون شاعر وأنا أصلاً أقل كثير  
أنا مش شاعر  
عشان وصفك ملوش تفسير  
أنا إزاي هكون شاعر  
وأنا اللي كتبته ف ديواني  
يادوب كام كلمة  
تركيهم ميوزنش غير جملة  
أساساً يعني مين شاعر مكونش ف حياته بيت  
أنا مليت..  
أنا منك نفسي بجد  
أقول خفيت

## حكمة

مشي الحيطان أأمن  
لكن مسيرها هتتهد  
مشي المجازفة خطير  
لكن فـ الطبعي هتمد  
مشي الجبان عاقل  
لكن الجنان أسرع  
نط الحواجز بموتة  
عديتها تبقي أجـدع  
أخذ الحقوق صنعة  
فـ الوش مش تخدع  
ترك الحقوق إوعى  
هيقوم عليك الحد  
شيل الهموم عـ الكيل  
هيكبرك فـ السن  
ويزود التجاعيد

إوعى يعدي الليل  
وتنام تقوم مظلوم  
حقك أهو قصادك  
وباین كأنه بعيد  
أكل الحرام أسهل  
لكن مبيشبعش  
أكل الحلال متعب  
وحلاله مبيقطعش  
مشی الطريق معوج  
يمكن يكون مختصر  
وساعات مبيوصلش  
أكل الحقوق فـ الخفى  
هيزول.. مبيدومش  
تارك الحقوق ع الحق  
كسبان.. مبيخسرش  
رافع الإيدين بالظلم  
مهما ضرب بالعصا  
ضربه مبيأثرش

اسمع كلام مظلوم  
الدعوة قبل النوم  
تهدي.. مبتكفرش

## عن ياسي

نفسى ف غيبوبة  
تمسح كل تاريخ الماضى  
نفسى أبعد عن كل اللى تاعبنى ومرجعلوش  
الماضى بيمضى حضور دايماً  
مع إني صراحة مذاكرتوش  
نفسى أرجع تانى وأكون فاضى  
نايم صاحي مش فارقة كتير  
كل اللى تاعبنى إن التفكير  
بيوجعني قلمي.. ومش بنسى  
مش فاهم ليه!! مش فاهم ليه!!  
مع إني صراحة محبتهوش  
أنا مش مجنون.. أو مش عارف  
أنا حد طبيعى كان متطمن  
وفجأة بدون أسباب خاف  
أنا أكثر واحد ف الدنيا



مفتّح دائماً وعمره م شاف  
الوحدة أنا كنت أسمع عنها  
بعيد لبعيد عمري ما جربت  
معرفش ليه لما كبرت  
فجأة أنا قربت  
الوحدة أساساً مش حل  
حقيقة أنا قربت أمل  
م الوحدة أو م التفكير  
أو من نفسي!!  
تكلمني سيادتك عن بكرة  
أخذك للبعيد بكلام هستيري  
وتلف الدائرة وأرجع أتكلم عن يأسى!!  
أنا أكثر حد قريب مني  
تقريباً يعني مبرتحلوش  
لكن كان طيب بصراحة  
ودائماً كان حابب يسمعني  
مع إني بكلمه عن نفسي  
وأول مرة يطلب مني

أَقْعِدْ وَيَاهُ وَأَسْمَعْلَهُ  
أَنَا مَسْمَعْتُوشْ

## إعدام ميت

مش لاقى كلام  
غير إني بنام ع الفاضي  
بحلم وتاخدي الأحلام  
من هنا لهنالك للماضي  
ومغمض عين وبشوف بالتانية  
مشهد كان عمره يادوب ثانية  
أنا أكثر قلقان م التفكير والتدبير  
أنا أكثر إنسان بينام صاحي  
أنا عمري اتلخص ف سجارة  
وبحب ركوب الطائرة  
علشان بالوقت أنا اتعلقت  
بسحاب وسواد دخان خالي  
كان اسود غامق  
وبيعلى ببطء ف سقف الصالة  
وبيفضل فوق وبيتبقى  
ويغمق عدسات النظارة

ف افتح شبابيك البيت علشان  
أنا كنت بخاف مـ الشبورة  
أنا عمري ما شوفت السبورة  
مع إني تملي بقعد قدام  
أنا شايف إنها مليانة حروف  
والحاجة تملي لما نقرب  
أكثر مـ اللازم بنشوف حقيقتها  
ف نموت مـ الخوف  
وعشان كده بطلت أشوف  
أنا كل حاجة حبتني محبتهاش  
مش عارف ليه مكرهتنيش  
رغم إني مقبلهاش  
والحاجة اللي أنا حبتها بجد  
كات واخدة قرار البعد ومفضلتلش  
الناس ألوان زي دخان الحفلات  
يتحبوا بس عشان الشكل  
والناس الباقية ع المسرح  
دائماً بتقل

كان لونهم أبيض زي الورد  
والورد أهو مات مبقاش يطرح  
فيه حاجات بالوقت بتتبقى  
وبتفضل كراكيب مركونة  
لو مرة حبيت تفتحها  
هتشوفها وترجع تقفلها  
علشان ترتاح.. أنا كده مرتاح  
أنا هطفي النور نفسي ف ضلمة  
استنى!! قبل ما تمشي  
هقولك كلمة...  
الضلمة وسيجارتني المطفية  
وصوت تكتكة الولاة  
لسة فاكرها...  
كانت أوقات بتريح  
وأنا نفسي أرتاح بصراحة  
ملقتش مع البني آدمين راحة  
الموت لو كان بيريح  
علمني إزاي أموت بالراحة

**البقاء لله**

البقاء لله يا نانااااااااااا  
عادي جدًا متزعلوش  
البقاء لله ف نانااااااااااا  
راحو سكة مييرجعوش  
دوري بينا يا دنيا دوري  
إمتى بس جاي دوري  
علشان يبكوا عليا ناس  
وأنا كنت حي مبيسألوش  
سييكو مني وسييكو منكم  
قولوا بس بتبكوا ليه؟  
هو الي مات كان واحشكم؟  
قولوا آه قولوا لأ متنكروش  
طب راجع نفسك كدا بالوقت  
كام مرة تعدي عليه عادي  
ولا مرة ضحكت ولا سلمت

بالله دلوقتي إزاي اشتقت؟؟  
طب فاكركام مرة ف أزمة.. احتاجك.. سبتة  
طب فاكركام مرة عالقهوة.. جبت ف سيرته  
لو مش فاكرك.. أنا بقى فاكرك.. ومتكذبش  
علشان وقتها كنت معاك.. ورديت غيبته  
طب فاكرك عم فلان جاركم؟  
طب فاكرك ست الكل جارتكم؟  
مبقتش زي زمان يعني تبكي عليهم  
مع إنك وقت الدفنة زمان كنت بتبكي  
وكنت بتجري.. حوالين الناس وتنادي عليهم  
وتقول للناس أنا مش ماشي خلوني جنبهم  
الفكرة مش إنك تبكي  
على موت علان ابن فلان  
الفكرة ف إن الناس كلها ماتت من جواها  
الفكرة ف إننا دلوقت مش زي زمان  
كلنا بني آدمين لكن مين فينا الإنسان؟  
مش قصدي أعيب ف الناس لكن..  
دي مجرد فكرة

أنا فيا عيوب أكثر منك.. وببكي زيك بالضبط..

لما أتفارق

ونصيحة من أخ صغير لازم تفهم إننا عايشين

علشان نتفارق

وأنا فاهم جداً لما هموت مع أغلبكم..

أنا مش فارق



## مرايتي

العيون حواليا يمكن شئتني  
بشوفني أصلاً عكس شوفهم  
والحقيقة الي ف عيونهم خوفتني  
إني اشوف نفسي ف مراية  
أو حتى أقرب م الحقيقة  
وأما جيت أبص ف مرايتي  
طلعت أمر منهم.. وجملتني  
الحقيقة فيا لكن مشوفتهاش  
والمشاعر عندي يمكن مبحسهاش  
وأما جيت أبكي ف حضني  
نزلت دموع مني كثير مدمعتهاش  
فُصّر الكلام كلام كثير  
جوايا أصلاً مقولتهاش  
وأقوله ليه وأبكي ليه  
وانتو أصلاً محستوش!؟

أنا واحد مات مليون مرة  
براه جواه وجواه برة  
كان نفسي أموت  
موتة عادية  
كان نفسي تكون  
ضحكتي حرة  
وبرغم حجم الخلاف بينا  
أنا وأنا زمان كنا  
جُمَال فعلًا  
وبرغم الدنيا اللي بعدتنا  
أنا وأنا زمان كنا  
صُحَاب جدًّا  
وده كنا وكان يا مكان  
مفيش حاجة بتفضل دايمة  
أنا نفسي أشوف نفسي  
من جوايا زي زمان  
نفسى بجد إن مرايتي  
متجبرنيش أكون أعمى

## عكس السير

مفيش حاجة مش فارقة  
مفيش حاجة مبتوجعش  
مبقولش أنا مش مستاهلة  
عشي ضاع ومرجعش  
كل حاجة سايبة فيا  
كل اللي ضاع بدأ يوجع  
عدد الفراق بقى ١٠٠  
ومفيش حد حاول يرجع  
بفارق قبل ما أتقابل  
بخاصم قبل ما أتصالح  
أنا مجنون ومش عاقل  
ف عكس السير أنا رايح  
كتر الكلام ع اللي راح  
مبير يحش  
حتى اللي راح استنناه

ومرجعش  
أما إحنا غلطنا ف الوداع  
أما اللي راح غلطان  
برغم إن إحنا حبناه  
مفهمش.

صوت المطر بيرن  
ققْل بآة الشبا بيك  
صوت الضمير بيزن  
هيزن ملين غير ليك  
ويقولك اتآخر  
خدني ف حضنك يوم  
ف ليل ملوش آخر

## أنا مجنون

ملّيت م الكلام وياكي  
حبّيت السكوت فعلاً  
قررت أنسحب علشان  
مبقدرش أوصفك دايماً  
أنا عاجز أوي ف وصفك  
أنا أقل من حبك

يكن كمان!

حظك قليل

علشان طلعت من بختك

ومتزعليش!

كلها أرزاق من ربك

هداني بيكي من طيبتني

وبلاكي بيا من عفوك

دا أنا أفقر من الفقرا

لا عندي مال ولا جاه

يدوب حلمي أعيش بكرة  
لكن شهادة لله  
أنا بحبك  
ومستغرب أوي لقلبك  
إزاي قادر يكون ليا  
إزاي قادر يعيش فيا  
وميملّش  
دا أنا نفسي مليت نفسي  
وكرهت طبعي علشانك  
وإنتي حبك مبيقلش  
طب أعمل إيه؟؟  
قوليلي إزاي  
أعبر مرة عن حبي؟  
عزفتي اسمي على الناي  
وأنا واقف وبتفرج  
حكيتي قصتي ألحان  
وفرشتي أرضك بستان  
وفرحتي بمشيتك جنبي

وأنا عجوز وكمآن أعرج  
مش لآقي كلام أقوله  
ولا لآقي حاجة تليقك  
إنتي حلم نفسي أطوله  
لكن آسف

مفیش فیا حاجة تفیدک  
أنا طیب وواد مجدع  
بس علی ما أسمع  
إن البنات کائنات  
یحبوا الغزل  
یعشقوا السکون  
وأنا ولا بعرف أتغازل  
ولا بقدر أکون هادی  
دا أنا مجنون  
أنا مجنون عشان  
سبتک تحببني  
أنا مجنون عشان  
سبتک تضمیني

طب ليه جوايا سكتيني؟  
وليه جواكي حبستيني؟  
نفسى بجد تعذريني  
عشان مش هقدر أقولك  
غير وحشتيني  
ومفيش حاجة اسمها بحبك  
في حاجة اسمها عايش  
عشان بس.. أكون جنبك



## سبع نصايح

اوعى تخاف الضلمة لو آخر سكتك نور  
كَمَلْ طريقك عادي واوعى تخاف الجوف  
خطي حواجز حلمك مهما يعلو السور  
متقولش ضاعت عين بالتانية هتشوف

اكتب كل اللي ليك واكتب التفاصيل  
اكتب المَجْنِي قبل ما تكتب الجاني  
اقرا لحد ما تتعب ويدخل عليك الليل  
وامسح كل اللي باع واحفظ الباقي

البتت دنيا.. جوة عيونها أمان  
فكك من اللمة.. واحدة يدوب تكفيك  
إوعاك تعشّمها وتسببها إنسان فاني  
الدنيا دَوَّارة وهتشوف اللي شافته فيك

الأب مش سيطرة ولا كنز مبيخلصش  
الأب ستر وغطا وفيضان حنية  
صاحب أبوك لو جدع وشوره ف الازمة  
وقت الصحاب انتهى وغيره مبيخلصش

الأم دي بداية من وانت ف اللفة  
هتلف بيك ياما ولفة تجيب لفة  
دي بدايتك اليي ابتدت متجيش عليها مرة  
لو مرة تجرحها هتموت عايش برة

إوعاك تخاف الموت.. موت وقول لأ  
متخافش مـ اليي افترى وتداري كلمة حق  
كسر العويل سهل.. من جوة أصله جبان  
قصر العويل لو جبل هيتهد فوقه بالزق

غدر الصحاب ألوان نقّي اليي هيليقلك  
بلاش تصاحب جبان ومن كل هب ودب  
خد الطريق بالعكس وشوف اليي باقينلك  
نقّي الصحاب بالوفي لو حتى هيكون كلب

## نوم متنامش

بتنام ع الجنب اللي يريح  
وأساسا جنبك مش جنبك  
وتعد ثواني عقرب ساعتك  
بيعادل بيها دقائق قلبك  
وكأنه منبه لسعادتك  
وحجارة الساعة مبتخلصش  
على طول شغالة  
بيعدي الوقت كالنسمة  
وبتصحى على نوم متنامش  
فكرت تبطل تفكير  
وتفكر بس ف النوم  
زي زمان!!  
على أي سرير  
بدون تكليف  
كنت تنام!!

زي زمان

بتنام وتقوم وتنام تاني

وتقوم مـ النوم تترجاني

طب سيني شوية

زي زمان

بتروح فـ النوم فـ ثواني

والبيت مليان كله أغاني

مكانتش تأثر فيك ثانية

مبقاش نومك زي زمان

مبقتش تحس بأي أمان

علشان خايف

لتقوم مـ النوم تخسر حاجة

فـ تنام قلقان وبكل سذاجة

بتنام شايف

نوم متنامش

علشان نايم مـ الخوف مخنوق

ومخدة عمرك مش سايعاك

وبرغم إنها تحت دماغك

مـ النوم على طول دائماً سرقاك  
والحلم الي بتفرح بيه  
قصاه تملي وعاملاله مونتاچ  
وطبيعي تنام ومتحلمش  
علشان النوم بالنسبالك  
فـ الصل كان نوم متنامش

## مفیش

وإيه غير مفیش  
وراها بلاوي أكيد مبتتحکیش  
جنایي یا فندم قادر یعیش  
ف ظل المعارك وضرب السيوف  
لسانی بضحك برغم الظروف  
وجرحي بیبيکی لأني ملمتوش  
وبکذب علیهم وبقول دي خدوش  
ولما بیان علیا المواجه  
جنابهم یا فندم بیذاروا مني  
ومین غیری یقدر لجرحي یشوف  
صراحة یعنی عالم مبیختشوش  
عشان کده بضحك ولبس وشوش  
ولما فلان حضني  
صراحة محستوش  
معرفش إن کان وجعني

معرفش إن كان داواني

لكن كل الي عارفه

شكلي الي حافظه

وقت البكا

دمعي ف عيني وقت اللقا

بيوجعني أكثر من وقت الفراق

ده حُضني كان يساعه بوسع السما

وحضنه كان يسعني من كام سنة

معرفش ليه يا فندم دلوقتي عليا ضاق

ومعدش شيء فاضلي غير حضني أنا

وبرغم إني ميت قادر أعيش

ووقت أما ييجي يتطمّن عليا

بداري بلاوي أكيد مبتتحكيش

وأضحك ف وشه وأقوله مفيش

## غلامة سكرانة

دي غلامة سكرانة  
إياك تلاعبها  
والسكر مش بالخمير  
إياك تغازلها  
يلزمك مليون عمر  
علشان تجالسها  
خليك واد واعي  
متشربش من نيلها  
العمر مش بعزقة  
ابعد بعيد عنها  
أنا عمري راح فيها  
وأديني شاب عجوز  
تلمحني ف عينها  
راجل ف وقت العوز  
ووقت ما تغمض



عد الأرض بصبح خوص  
نصيحة لوجه الله  
متدوبش ف عيونها  
هتبقى زي كفيف  
وعمرک ما هتطولها  
بجمالها عَمَّياني  
وم الخمر سقياني  
وجعلاني  
أكون مدمن لخمرتها  
والشرع حرم السكران  
يسكن ف جنتها  
قرب أوي منها  
تلاقيها صَبَّاني  
وجوة كاس إيدها  
تلاقيها حبساني  
عرق بلح مركون  
ف كاسها نقعاني

بقالي سنين  
عـ الحال  
بشرب وأنا غرقان  
فـ خمرها العالي  
عشمان أنول برها  
وأبدأ اعيش تاني  
يا شطها الهايج  
احدفني يوم عـ البر  
بقالك سنين سابق  
نفسى أكون فايق  
الباقي من عمري  
لو حتى هيكون مر  
اخبطني فوقني  
رسيّني عيشني  
على شطك الدافي  
علّمني أكون حر  
بكت الرمال مني  
ووشوشت ودني

"دي غلامة سكرانة  
إيه اللي جابك ليها؟"  
معرفش إيه جابني  
لكن القدر أسباب  
وقلبها السجان  
خبّط عليا الباب  
وأنا لسة ف اللفة  
نزلت ألاعبها  
ومسكتُ بإيديها الدفة  
وكبرت أنا ف حضنها  
ومش قادر أبعدھا  
دي غلامة سكرانة  
مهما قسيت منها  
مش بقدر أفارقھا

## غيبوبة

فايت وراك كل الي بيحبوك  
عاش في دور "صدقني أنا مظلوم"  
هما الي تاهوا قسيوا عليك وباعوك  
سارح ف كدبة كبيرة.. كدبة "أنا مهموم"  
تايه بنفسك تايه بكل ما فيك  
غرقان ف بحر موجه عديم إحساس  
كل الي همك تظهر بشكل غريق  
ورامي روحك متعلقة بالناس  
عندك مراية بتخاف أوي منها  
وتبان حقيقتك تقول أنا مجبور  
وتداري نفسك وتقفل عينيك عنها  
وبحجة ضايعة تقول إزاز مكسور  
شايف عيوب الناس كيف أوي عيوبك  
حتى الضمير عندك بقى معدوم  
بتداري عيبك لتزيد أوي همومك  
بكفاية أوهامك ومن نومك اصحى وقوم

## علي صوتك

آدي الحياة وآدي عمايلها  
مكتوب علينا نكون من العاشقين  
عاشقين قلوب عايشة بلا معنى  
ومن العذاب لازم نكون حاسين  
قطر بيفرم كل الي فاتوا عليه  
حاسب بأة ابعد بعيد عنه  
ما تداري قلبك حافظ عليه خبيه  
مستني إيه دا انت الوحيد منه  
كل الي قلبك كانوا مش عايشين  
كدبوا عليك علشان تكون منهم  
وأهو كاس وداير ولازم نكون شاريين  
لازم نشيل المر بقى عنهم  
وأهو كل وقت لازم يكون له أذان  
والشمس لو غابت أكيد في يوم راجعة  
دور على نفسك بلاش تكون خيبان  
وعلي صوتك أكيد فيه ناس سامعة

## اختلفوا عالنيش

كات نجمة ف سماها  
كان حلمي ألمسها  
كات نسمة وقت الفجر  
وف صدري بحبسها  
لجل إنها تبقى  
جوايا متخرجشي  
وأنا أبقى ليها أبقى  
وعنها مبعدشي  
أنا كنت ليها جناح  
وقت أما تنوي تطير  
وكنت ليها أمان  
مكُنْتُش من الفراير  
ضحكتها كات دنيا  
ف عنيتها جنة أرض  
حبّتها ف الله

وحلفت نبقى لبعض  
أما كبار السن  
شافوا إننا مجانين  
يا ابني الحلال مش حب  
ده شيك وبالملايين  
المهر والشقة  
والعفش والسفرة  
هتجيب ده كله منين؟!  
أنا أكثر حاجة بجمعها  
ف الوقت الحالي هي دموعها  
دا أنا ياما بكيت جوة عيونها  
علشان أكسبها ومخسر هاش  
أنا عايش ساكن دنيته  
أنا خايف جداً مكسبهاش  
الغربة شيء مقنع  
وساعتها هتطولها  
اتعب عشان تبقى  
راجلها وحلالها

وبعد سنين وسنين  
فد الغربة والوحلة  
والجري ع السكة  
قالوا إن أنا معيش  
طب ليه يا أسيادنا  
عجبتهم السّفرة  
واختلفوا ع النيش!؟



## السيرة

مين الي غاب  
ومجاش؟؟  
وساب الحضور فاضي  
ومين الي مستناش؟؟  
وبالفراق راضي  
ومين الي مستني؟؟  
قاعد ع الكرسي  
معمي من الدخان  
بيلم ف الماضي  
اللمة أهي اتقسمت  
والصورة أهي اتقطعت  
وبعد ما اتجمعت  
لسة ليها باقي  
كان فيه هنا واحد  
ع الطرف كان قاعد

أما اللي كان واقف  
راسه مش باينة  
وحشة أوي اللمة  
أما تتفرکش  
والي لقط الصورة  
خياله متنغمش  
والي فاضل سيرة  
مسيرها تتفنّش  
يا ابن الحلال اسمع  
مفیش حاجات توجع  
أكثر من الوحدة  
وعشان تكون مجدع  
وقموت وبرضه تعيش  
سيب حاجات أكثر  
صورة واحدة متكفیش  
ارسم ع الدكة  
وابصم ع السكة  
واجمع من التركة

اللي تلاقيه كسبان  
وقبل ما تنام  
لازم تسيب بقشيش  
دلوقتي لما تموت  
سيرتك أكيد هتعيش

## الفراق نعمة

فات الكثير منك  
والباقي بتهدييه  
وكل كلام اتقال  
بتنامي فـ بتنسيه  
وبتبكي كثير لكن  
الدمع مش بيفيد  
ساحت دموعك إزاي!!  
وشمعك مش بيقيد  
الحق مـ الي اختلف  
ميعرفش إنه اتلعن  
وهتفضلي تسبيه  
بتقولي بتحبيه  
وبتقولي مش فارقة  
أفهم أنا إيه؟  
الجملة مش راكبة

نار الفراق ع الباب  
يا تفتحيلها الباب  
يا تقولي مش فاتحة  
معادلة مش صعبة  
يا تبقي بتحبيه  
يا إما بالمعروف  
تتفضلي تفارقيه  
مش كل الفراق مودة  
ومش شرط م الأول  
الفراق مش عيب  
لو حتى كان هيغيب  
لما الفراق بيصيب  
مش شرط إننا نكمل  
وإحنا كبني آدمين  
منعرفش إيه ف الغيب  
ف عادي إننا نطايطي  
وعادي إننا نسلّم  
أما عن الواد

ف هو بيجبك  
ورغم إنكو بعاد  
لسة واقف جمبك  
ف متجبريش خاطره  
وتقولي رايداك  
متخدعيش قلبه  
وإن مرة قال عايزك  
ف ده عشان رايدك  
أما عن حبك  
ف هو راضي بالبعد  
وهيقتنع جداً  
بانه كان غلطان  
والذنب مش ذنبك

## حواجز مبتقعش

أول ما نور الطريق يطفئ  
كَمَلَّ متخافش  
هتسمع صوت بينادي  
كَمَلَّ متوقِّفش  
لو مرة ضهرك تقل  
متسندش على حد  
طول ما انت ماشي بطولك  
صدقني هتمد  
وعشان يزول الوجع  
لازم تدوق الدواء..  
لو حتى هيكون مُرّ  
وعشان تنول سكتك  
لازم تكسّر صخر..  
كسّر صخورك مُرّ  
متقفش ف مكانك..

مكانك ده مش محجوزك  
حلمك ولو مش جايز  
بكرة أكيد هيجوزك  
خدلك مكان فى الكادر  
قبل ضرب الفلاش  
مين فينا يعني ابتسم  
قبل ما الحياة تتعاش  
قلبك مادام بيدق  
عافر ولو راقد  
فى غرفة الإنعاش  
جالس كبار السن  
دي الحكمة مـ الشيبة  
أغلى كتير مـ الذهب  
كل كلمة حكاية  
وفيه ألف لغز وسبب  
والبنت هتجيلك  
على الباب تناديلك  
ومنين تروح يا صديق



لو هي دي نصيبك  
ف متحاربش الكون  
وتكون شبه فرعون  
وتغرق ف بحر الكفر  
مش هينجداك غيرك  
ف اصبر وهتجيلك  
أما الرضا بالنفس  
من دعوة الوالدين  
هتشوفه بالعين  
مش شرط يتحس

## فولة ومقسومة

رغم إن البيوت مقفولة

فيها اللي يشبهلك

فيها اللي باع نَفْسَه

وفيها اللي ضاق نَفْسَه

وفيها اللي من يأسه

يتمنى يندهلك

يحكيك الماضي

ف يصعب عليك حاله

ف تقربه من حضنك

رغم إن الطريق واحد

فيه اللي موصلشي

وفيه اللي قال يمشي

وفيه اللي قال يجري

وفيه اللي راكب تاكس

وأما وصل محاسبشي  
وفيه اللي واقف بس  
مكتفي بالبص  
تايه من الأول  
ومع إنهم وصفوله  
برضه مفهمشي

فَ الدنيا مقسومة  
ومنك خلق أربعين  
مهما ضاقت بيك  
فيه لسة ناس تانيين  
لو مرة يحكولك  
هتهون عليك بلاويك  
ولسة ياما حاجات  
فيه ناس مبتعشهاش  
ومع إنه رتبها  
بينام عشان بكرة  
ف يصحوا يلاقوه مات

فد احمد ربك على اللي فد إيدك  
عود نفسك ترضى بحالك  
فيه حاجات لو كات بينالك  
مكنتش هتستنى تجيلك  
هتجري عشان تلحق  
وتاخذها قبل معادك  
وساعتها مش هتدوم  
لأنها مش حقك  
فيه حد هنا جنبك  
كات مكتوباله قبلك  
وانت سبقته بيوم  
والصبر لو ١٠٠ سنة  
حلاله أكيد بيدوم

هي يادوب لعبة  
ومتقسمة الفورة  
بالحضور قدام

ولأنها صورة  
حتى ولو مكسورة  
فيها هنشبه بعض  
منذ السنة الاولى  
إحنا يادوب زرعة  
نشبه لشكل الفولة  
أنا وانت ف القسمة  
فولة ومقسومة  
انت يادوب فص  
وأنا يادوب فص  
هناخذ من الأرزاق  
النص بالنص

## عن يوم مجاش

كتر الكلام عن يوم مجاش  
خلّاني أشوفه بكل دقة  
يوم هيمشي فيه فلان  
وقلبه مفهوش حتى دقة

كتر الوجع مش منك انت  
كتر الوجع من يوم هيبجي  
مش عارف حتى جاي إمتى

كتر الكلام عن الفراق  
فهمني إن فراقنا عادي  
وانت وأنا نهايتنا واحدة  
سابقون أم لاحقون  
كل واحد فينا عايش

على تكة واحدة  
فـ مش فارقة

ساعات كثير بتمناها قبلك  
فـ بخاف عليك تموت وانت حي  
ولما بشوفك سابقني بخطوة  
بخاف وبكره يومي الي جاي

## كأنه مكانش

ضحكتها الميثة ف عينيها  
والرعدة الزائدة ف إيديها  
على طول الخط ملازمها  
علشان قصتها نَهَتْها ظروف

كات وردة ف يوم م الأيام  
ويا ما داعته قبل أما تنام  
دلوقتي خلاص النوم بح  
علشان بتنام ميته م الخوف

مرمية ف حضن الوحدة تملي  
قافلة الأوضة بمليون ترباس  
حظها وقعها ف حد تملي  
موت جواها كل الإحساس



عارفين بتخاف من الناس ليه  
بتخاف يسألوا عنه الناس  
أكثر أسئلة ممكن توجع  
سابق ليه وسبتيه ليه؟

وقتها دموعها لازم تظهر  
ف بتضحك ضحك هستيري  
علشان ميبانش!!

وتقول عادي قدرني وقدره  
نصيبه هيبقى نصيب غيري  
وكأنه مكانش!!

البت رقيقة ف ملامحها  
تحضنها تكون بسكوتة ف الشاي  
مش لازم أبداً توجعها  
غنيها.. غنيها ومتقوليش إزاي

اشكمها فـ وقت تكون هادية  
احضنها وقت مـ تتعصب  
ازعل منها وقد ما تزعل  
صالحها ولو حتى بوردة

## طفل متعشم

أول كلام إنك  
مبتشبهيش ولا حد  
وآخر كلام منك  
مبتزاحيش فـ البعد  
قلبك على قلبي  
دق القلوب واحد  
متجربيش وجعي  
وجع القلوب جاحد  
وإن مرة قلت فراق  
متصدقيش قلبي  
أنا طفل متعشم  
وهيبكي وقت الجـد  
اسرحي فـ عين اللي واحشينك  
وسيبها تتملي  
قربي أوي ومترمشيش عينك

لو ثانية بيها أولى  
احضني عمرك ببعمرى  
واتنفسى بيا  
اهربى ومترجعش أبدًا  
بس اهربى ليا

يا أجمل بنت فى الدنيا  
يا أجمل بنت فى عنيا  
وحشتينى

أنا آسف  
وكان كل الخلاف بينا  
كلام متقالش  
صحيح لو مرة كان اتقال  
يجوز مفارقش

بحكم العشرة والملح  
لغيت الجمع والطرح

أنا مبسبش  
وكل مسافة كات بينا  
معاندة معايا تقريباً مبتقربش

يجوز البعد أريحلي  
يجوز الوحدة مبتوجعش

كثير مـ الناس بتجرحني  
ودمعي أساسا مبيأثرش

أنا محتاج أكون وحدي  
أو أعاشر ناس تريحني

محتاج أتكلم مع ناس  
بتعرف تسمع متردش

محتاج أفضفض لقلوب  
بتعرف تحضن متصدش

أنا كاره كل الفضضة  
والمسكنة والطبطة

محتاج الحزن اللي يريح  
حتى ولو مفهمش

مش عاوز أتكلم مع ناس  
وفي الآخر يقولولي معلش

مش عاوز أحس بولا حاجة  
أعصابي سايبها ف تلاجة

زهقان من نفسي وم الايام  
ما كفايا كلام!!  
أنا آسف  
أنا عاوز أناام

## أرزاق ومقسمها الرزاق

ارضى باللي معاك  
وخذ اللي مقسوملك  
بلاش تبص لغيرك  
كده أو كده يا صديق  
هتنول اللي مكتوبلك  
فـ صَفِّي لله قلبك  
ومتطلبش من غيره  
الفكرة فـ إنك ترضى  
وهو عليك يرضى  
فـ يغرقك من خيره  
واوعى فـ يوم تاخذ  
من غير ما تدي لغيرك  
ساعد عشان تتساعد  
ويزيد عليك خيرك  
كل اللي قال مش سايب

هيجيله وقت يسيب  
كل الي قال مش جايب  
هيجيله وقت يجيب  
نصيب ومتقسم  
على كل من ف الأرض  
يا ترضى بالقسمة  
يا تموت بنار البعد  
كل الي ماتوا ناقصين  
ف الرزق بصوا لبعض



إهداء إلى  
أحمد أبو النجا  
وليد أبو النجا  
إبراهيم أبو النجا

## مفيكوش شبه مني

أحمد  
أنا فاكرك وانت.. بتخاف من القُرب  
مع إنك من جواك بتقرب  
أنا شايفك وانت بتعمل زي  
كل اللي عملته وبتجرب  
أنا فاكّر مرة نزول البحر  
كان شكلك طفل  
أصغر بكثير من 6 سنين  
والمية طبعا مش شايلاك  
إكمنك كنت شوية تخين  
عارف؟  
أنا وانت دائماً مختلفين  
عن لبس وأكل ولعب وجد

لكن دائماً متفقيين  
إن احنا اصحاب  
كان صعب يعدي عليك اليوم  
من غير ما تخط ع الباب  
يلا البس وأنا مستنيك  
متتأخرش.. حاضر نازل  
وكالعادة بتأخر من غير أسباب  
والعجلة الحمراء المركونة تحت السلم  
لو ينفع إنها تتكلم  
هتقولك قد المشي وحناقتنا عليها  
إن أنا كنت بحبك حب بجد  
لكن كان نفسي أطلع زيك  
أستقبل كل الحزن وعادي  
من غير ما اتألم  
أنا آسف جداً علشان  
وقت اللعب كان يقلب جد  
أنا أصلاً غيرك ف الدنيا محتاجتش حد  
وليد

كان شبهك شبهي ف تفاصيلك  
وبيجمع بينا اللامبالاة  
وف لعب الكورة كنت باجيلك  
أتخانق وأحلف بالله  
مش هلعب غير لما أبقى معاه  
مع إنك كنت أصغر مني  
وبنخسر دايماً  
ومش عارف ليه بختارك  
وف كل مرة ألعب جارك  
بخسر آه..  
وبقولي عادي الماتش فداك  
وساعتها بعشق نرفزتك  
وبحب خسارتي حب جنون  
وأخسر تاني بس أبقى معاك  
استنى هقولك على حاجة  
أعصابك سيبها ف تلاجة  
واسمع مني!!  
لما كبرنا مبقتش أختارك

والبعد بينا بقى بيساع  
والدنيا بتاخذ من عمري وعمرك  
اللي يكفيها!!

واللي بيتبقى بيتباع  
تفاصيل الشكل اللي جمعنا  
مبقاش هو نفس الشكل  
مش عارف ليه اتلخبطنا  
لكن دايماً موجود الحل  
متشلس الهم

أنا عارف مهما هيحصل بينا  
حبي وحبك عمره ما هيقل  
واللي بيجري ف عروقنا  
هو هو نفس الدم  
ف متشلس الهم

إبراهيم  
يخرب عقلك لساك عصبي

ولسة بتقلب حزننا ضحكة  
ولساك عيل مهما كبرت  
لسة بتشبط ف إيدين ستك  
وتعيط وتشد الطرحة  
وبتجري تدارى ف حضنها  
علشان بتخاف تاخذ الحقنة  
شايف إنها تقدر تحميك  
والسر اللي مخبيه عليك  
إنك كنت ساعتها عبيط  
بتجري قوام وتاخذها ف حضنك  
وهي مبتحميش ظهرك  
وتكلبش إيديها ف إيديك  
وبردك كنت بتاخذ الحقنة  
طول عمرك فينا كنت الطيب  
أرمي كل حمولي عليه  
ويقول حاضر ويقول طيب  
وقلبه أخضر وميحبش غير ف الله  
صاحب صاحبه ف عز المحنة عمره ما ينساه

بس سَهْن وتعلب مكار  
بالك انت.. عليك أفكار  
تودي ف داهية وتبان مسكين  
معملتش حاجة  
وتقول ع الناس هما (الجشعين)  
ف الآخر والله بحبك  
واقف جنبي وواقف جنبك  
عمر الدنيا ما بتفرق بينا مهما بعدنا  
والوش لو كرمش حبة  
جوانا هنفضل أطفال مهما كبرنا

## ناس فوتوشوب

أنا ساذج جدًا اكمني  
بتعلق بالناس ف دقيقة  
وببات مجروح.. ده لأنني  
ممسوح م الناس بالأستيكة  
أنا مش زعلان.. بالعكس  
أنا فاهم أصلًا إن الناس كلها  
فوتوشوب  
متستغربش اسمع بس  
الناس ف الوش بتضحك آه  
لكن ف الظهر.. بتلعن وتسب  
وأغلبهم ماشيين بالغش  
يعني الناس مش حقيقيين  
كل يومين تلاقيلهم وش  
يوم بيحبوا ويوم بيسبوا  
ويوم تكتشف إنك أصلًا

مش من ضمن البني آدمين  
وإنك أصلاً مهما تحب  
بيعدي الوقت وتتفارق  
وتبدأ تعشق ناس تانيين  
أنا آسف علشان بجمعكم  
لكن كلنا نشبه بعض  
أقرب مسافات بنطولها  
أبعد نقطة برغم البعد.. عشان بنحب!!  
وإن المسافات الأقرب  
أبعد نقطة برغم القرب.. عشان بنغش!!  
وإننا علي بعضنا يا أسيادنا  
جوة المية مش بنقب  
ومن كتر التحويل ف الوش  
بقينا كلنا ناس فوتوشوب



## فابريكا

أنا لسة بخاف م التنورة  
علشان مبلفش

أنا لسة مخبي شريط الماضي  
علشان ميسفش

أنا لسة بكشر ف الصورة  
علشان بتنغمش

وبشوف كل قديم ليا  
قبل أما بنام

أنا فاكر قعدة رومانسية  
كات ف الأحلام

أنا عمري بيعدى الـ ١٠٠  
والقلب شباب  
وبحب كل اللي فارقني  
من غير أسباب

أنا قلبي استعماله خفيف  
مركون من فترة بس نضيف  
مفرقش كتير عن أنتيكا  
مـ الآخر قلبي أنا فابريكا

عبد الحميد أحمد نافع

( عبده نافع )

المحلة الكبرى (محافظة الغربية)

مواليد ١٩٨٨/٩/٢٥

<https://www.facebook.com/abdo.nafa.9>

<https://www.facebook.com/abdo.nafe3>